

ŽELJKO KOPANJA, OSNIVAČ "NEZAVISNIH NOVINA"

Ima mnogo onih koji ne vole gospodina Radončića, što je normalno, kao što mnogi mene ne vole. Ali, iza gospodina Radončića ostaje veliki poslovni uspjeh. Sarajevo je dobilo objekat koji će postati metafora i Sarajeva, i Bosne i Hercegovine. Objekat simbolizira bosansku pamet u arhitekturi, rad bosanskih graditelja i bosanski-privatni kapital koji je uložen u njega

Mirsad SINANOVIĆ

Željko Kopanja osnivač je banjalučkih "Nezavisnih novina". Na neki način je pionir antidesosvske politike u Republici Srpskoj. Zbog svojih stavova i pisanja njegovih novinara našao se na udaru ekstremista. Pod njegov auto u Banjoj Luci 1998. godine podmetnut je eksploziv. Ostao je bez obje noge i jedva preživio. Međutim, nije odustao od borbe za slobodne medije. U Sarajevu je prošle sedmice prisustvovao svečanom otvaranju "Avazovog biznis centra". – Gospodin **Fahrudin Radončić** mi je pomogao kada mi je bilo najteže i morao sam se pojaviti na otvaranju "Avazovog biznis centra". Pomogao mi je kada sam bio u bolnici u Austriji i kada smo štampali "Nezavisne novine" – kaže Kopanja.

Republika Srpska je talac politike Vojislava Koštunice

Kako biste ocijenili uspjeh gospodina Radončića i kompanije "Avaz"?

KOPANJA: Ima mnogo onih koji ne vole gospodina Radončića, što je normalno, kao što mnogi mene ne vole. Ali, iza gospodina Radončića ostaje veliki poslovni uspjeh. Sarajevo je dobilo objekat koji će postati metafora i Sarajeva, i Bosne i Hercegovine. Objekat simbolizira bosansku pamet u arhitekturi, rad bosanskih graditelja i bosanski-privatni kapital koji je uložen u njega.

Da li Vas Sarajevo doima kao glavni grad države Bosne i Hercegovine?



KOPANJA: Ja ga doživljam tako, ali on još nije multietnički grad, kakav bi trebao biti. Kao što ni Banja Luka po tome nije ni blizu Sarajevu. Glavni grad ne smije biti ni bošnjači, ni srpski, ni hrvatski grad, već sva tri ova naroda. Onda će se to proširiti na druge gradove u državi.

Mladi političari

Kriza vlasti u Republici Srpskoj se reflektirala na krizu u državnom vrhu, u svim državnim institucijama. Da li je u pitanju bojkot reformi, puta ka evropskim integracijama? Šta hoće, recimo, gospoda Čavić i Ivanić?

KOPANJA: Ja se nadam da će BiH postati normalna država, ali nam za to trebaju normalni političari. Kao političara cijenim premijera **Adnana Terzića**, koji mnogo radi i ima rezultate. Gospodin **Mladen Ivanić** se ponaša kao da je Bosna i Hercegovina jedan mali kućni savjet, čas podnosi ostavku, čas je uslovljava, te rad Vijeća ministara "uvezuje" sa radom Vlade Republike Srpske. Sve ovo ne može obezbijediti istinske i brze reforme. Inače, ne vjerujem u uspjeh nacionalnih stranaka, to je neiskreno koaliranje.

U šta vjerujete?

KOPANJA: Samo u mlade političare, oni će BiH izvesti bar na put ka Evropi. Ja preferiram neke političare, koji su prihvatljivi za sve Bosance.

Koje?

KOPANJA: Za Srbe, Hrvate i Bošnjake najbolje je rješenje **Zlatko Lagumdžija**. Tu su i **Beriz Belkić**, **Milorad Dodik**, **Neven Tomić**. U suštini, ja ovdašnjim političarima ne vjerujem u smislu da će napraviti veliki iskorak prema Evropi. Sve su mi nade u mlade generacije. Mora postojati Vlada BiH i da ona odlučuje u ime Parlamenta i svih građana.

Terzić je kao premijer mnogo uradio


Govorili ste o rezultatima premijera Terzića?

KOPANJA: Gospodin Terzić je trasirao nekakav evropski put, uz pomoć OHR-a, naravno. Mnogo zakona je usvojeno, da je za ne povjerovati. Kod gospodina Terzića cijenim to što ne boluje od neke visine, nije prepotentan, niti je fasciniran time što je premijer, čak ni sa zvučnim imenima evropskih i američkih političara. On ima sjajne odnose, kao predsjednik Vijeća ministara, sa mnogim kompanijama u Banjoj Luci i Mostaru. Kao premijer mnogo je uradio, i ja to sada ističem, bez obzira što nisam pristalica nacionalnih stranaka.

Ashdown od naših političara pravi pajace

Kako biste ocijenili rad visokog predstavnika Paddyja Ashdowna?

KOPANJA: Ja zamjeram **Paddyju Ashdownu** što od naših političara pravi pajace. On kao da traži podanike, a ne partnere. Više je mogao ostvariti da je razvijao partnerske odnose sa lokalnim političarima. Mnogi političari su ucijenjeni, jer mnoge obavještajne službe, koje špartaju Bosnom, imaju dokumenta za njihovu kompromitaciju. Zato ponekad vuku neke iracionalne poteze.



Smatrate da vizija budućnosti naših političara traje četiri godine, koliko im traje mandat?

KOPANJA: Današnji političari, osim što su korumpirani, u mnogim situacijama se nemoralno ponašaju, zbog čega bi u drugim državama bili smijenjeni. Mi smo objavili jedan dokument o slučaju "Alijagić" iz kojeg se vidi da je savjetnik predsjednika Republike Srpske zastupao gospodina Alijagića u tužbi protiv našeg entiteta. Niko me ne može ubijediti da tu nema dilova. Bilo bi normalno da je predsjednik zbog ponašanja svoga savjetnika podnio ostavku. Takvih primjera je na stotine. To je vizija naših političara. Sadašnja garnitura političara ne može ništa značajnije promijeniti. Viziju Bosne će ostvariti oni koji sada završavaju fakultete, koji će viziju tražiti u razvoju, a ne čuvanju nekih tekovina. Oni će građane povesti iz ove čamotinje.

Stvar retorike

Kako objasniti pojavu da su mnogi građani u BiH za SDP, a nisu za njegovog lidera Zlatka Lagumdžiju?

KOPANJA: Mnogo toga je na personalnoj razini, pogotovo u Sarajevu. Ja cijenim stavove gospodina Lagumdžije, da li se on ponaša liderski, da li je diktator, to znaju članovi SDP-a. Kada je u pitanju politika gospodina Lagumdžije, ona je najprihvatljivija za sva tri bh. naroda. Ja još nisam čuo da je gospodin Lagumdžija ponizio Srbe ili uzvisio Bošnjake u bilo kom kontekstu. Njegove izjave su na istoj platformi. Dobro se sjećam da je, ne tako davno, gospodin Lagumdžija promovisao neke partnerske odnose sa međunarodnom zajednicom, a ovi političari su njeni podanici. Sjećate li se da je bio pritisak da se "BH Telecom" proda za tri miliona maraka, a riječ je o kompaniji koja vrijedi najmanje milijardu maraka. I Beriz Belkić je prihvatljiv za Srbe, Hrvate i Bošnjake, ali je on u stranci koja još nema svoj identitet u političkom životu. Tu je i gospodin Dodik koji prije izbora populistički djeluje, pokušava se dodvoriti svome biračkom tijelu, ali on je za jednu normalnu državu ravnopravnih naroda, bez obzira na vjeru i naciju.

Ja cijenim stavove gospodina Lagumdžije, da li se on ponaša liderski, da li je diktator, to znaju članovi SDP-a. Kada je u pitanju politika gospodina Lagumdžije, ona je najprihvatljivija za sva tri bh. naroda. Ja još nisam čuo da je gospodin Lagumdžija ponizio Srbe ili uzvisio Bošnjake u bilo kom kontekstu. I Beriz Belkić je prihvatljiv za Srbe, Hrvate i Bošnjake, ali je on u stranci koja još nema svoj identitet u političkom životu. Tu je i gospodin Dodik

Mada je u izjavama radikalniji od SDS-a?

KOPANJA: To je bila stvar retorike prije izbora, a ne njegovog političkog ubjedenja.

Kako će funkcionirati Vlada Pere Bukejlovića bez glasnosti Vijeća naroda? Krši li se ovim Ustav Republike Srpske?

KOPANJA: Meni nije jasno o čemu političari u Banjoj Luci vode računa. Recimo da **Bukejlović** sastavi vladu bez podrške SDA. Istovremeno čekaju da SDA u Vijeću ministara podrži ministre iz Republike Srpske. To je neka alhemija koju ja ne razumijem. Mislim da PDP neće podržati gospodina Bukejlovića, onda će se kaos u Republici Srpskoj samo produbiti. Postavit će se pitanje funkcioniranja institucija Republike Srpske.

Pitanje svih pitanja je hvatanje ratnih zločinaca. Kako bi ovo pitanje mogla riješiti Bukejlovićeva vlada?

KOPANJA: Međunarodna zajednica s pravom optužuje institucije Republike Srpske. Uprkos tome, svi u Bruxellesu znaju da krivicu za nehvatanje ratnih zločinaca snosi **Vojislav Koštunica** u Beogradu. Prava adresa za neuspjeh MUP-a RS-a i državne granične službe o tom pitanju je u Beogradu. Svi moraju tražiti odgovore od gospodina Vojislava Koštunice. Zbog ovakve politike Republika Srpska i Bosna i Hercegovina postali su taoci gospodina Koštunice. ●